

TE HEHEURAA API

I neia i te piha neneiraa no te Ekalesia a Iesu Mesia i te Fcia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farani i te matahiti hoê.

Nu. 12

Detema, 1919

Mat. 13.

Te horoa atu nei au ia outou i ta'u tavini ia Birikama Youne, ei peretiteni i nia iho i te apoora hahere hoe ahuru ma piti ra, o te reira ahuru ma piti o te mau ia i te mau taviri i te iritiraa i te mana no ta'u ra basileia i nia i na otia e maha no te fenua nei, e i muri a'e i te reira ia tono i ta'u nei parau i te mau taata atoa, e vai nei. B. F. S. 107: 40.

Ei reira e haamana'o ai oia i te mau fenua moana ra: te na o maira te Fatu, E haaputuputu vau i te feia atou o te utu afare o Iseraela no o mai i na hopea e maha o te fenua nei, mai te parauhia e te peropheta ra e Zenosa.

E e ite hoi te ao atoa nei i te ora a te Fatu ra, e e hui-maitaia te mau fenua atoa, e te mau re'o atoa, e te mau opu atoa, e te mau nnnaa atoa, te na reira maira te peropheta ra. Baka a Moromona Pene 19: 16, 17.

TE OHIPA A TE FATU I TE FENUA TUBUAI.

Te haamataraa o te evanelia a tere mai ai te mau Mitinare faaue no Tiona mai na nia i te hoe pahi. Tootoru ratou i te haereraa mai. Teie to ratou mau i'oa, O Paraita, e O Noa e Turuati. O ratou ra te mau orometua matamua tei tere mai na nia i te miti Pacifica no te mau fenua nei. Ua faataa hia ratou e te peropheta Birigamu Ione ei orometua no to

Tahiti nei. Tootoru ia ratou i tae atu i tana fenua rii no te moana ra oia, Tubuai, e o te fenua matamua mau hoite reira tei farii i te Evanelia mau e te viivii ore, e te parau mau, mai tei heheubia mai i te tamarii a te taata i teie nei tau hopea nei.

Tapae atura ratou i taua fenua ra i na mahana hoe ahuru e ma maha, i reira, reva'tura toopiti o ratou, parahi ihora te hoê orometua i taua fenua ra i Tubuai, o Paraita to na i'oa. A faaea'e oia i reira ra, opere atura oia i te hoê vea parau mau, i te faatiaraa i te hoê amaa Ekalesia i taua fenua ra i Tubuai. A rave itoitaito oia i taua ohipa ra i reira, faa fariuhia maira e ana te hoê papaa i taua na mahana ra, O Amabarase tona i'oa o te taata matamua ia ta'na i faafariu mai i roto i te Ekalesia i taua amaa ra i teie nei mau pae fenua Polinesia, o tei parauhia e e mau fenua maohi. Pape-tito hia ihora o Amabarase i te 16 no Tiunu i te matahiti 18-44 i Tubuai. Te vai ra te hoe pupu iti o te mau papaa i taua fenua Tubuai ra, e te hamani ra ratou i te hoe pahi, ei ravea no ratou no te hoiraa'tu i te fenua ra i Amerika, area Paraita tei rotopu ia ia ratou, te a'o ra oia i te parau no te ora ia ratou. Putapû a'e ra to ratou aau i te parau no te Evanelia. Faafariu faahou maira Paraita i na papaa toomaha atu â e na taata maohi hoi toomaha, teie to ratou mau i'oa o Napata, e Terii, e Pauma, e Haamoe, O ratou ia te mata-mehai o te nănă i taua fenua ra tei farii papu mai i te parau mau no te ora tei ueuehia e te tavini o te Atua i tana fenua ra.

Ia tae ra i te mahana Sabati i te 28 no Tiurai i te matahiti 1844 faatia ihora Paraita i te amaa matamua o te Ekalesia no teie nei paeau i te ao nei i te fenua ra i Tubuai, e ia hope a'era hoê matahiti e tau avae rii, vaiho atura Paraita i te mau taeae o te Ekalesia i Tubuai ra mai te haapao maitai ratou i te mau ture a te Atua ra, reva maira oia i Tahiti nei.

E ua haere atoa oia i te mau fenua Tuamotu, i muri a'e i to na revaraa mai i te matahiti 1852, ho'i atura te mau orometua no te Ekaletia mau nei, i to ratou fenua 'ai'a, ma te vaihoiho i te faatereraa ohipa a te Atua ra i roto i te rima o te autahu'a raa mo'a.

E i muri a'e i to'na revaraa mai, te tupu rii rii noa ra te ohipa i taua amaa ra i te maitai, e i na tau muri mai, e rave rahi te mau orometua no Zi-ona mai i tae mai na muri mai ia'na, e ua te reira i faatupu te hotu o te huero i ueuehia e te tavini matanua ra e Paraita.

I te anotau râ i muri mai, te vai atoa ra te mau orometua maohi e te mau orometua papaâ, e ua faahoia ratou i to ratou iho fenua mau, e na roto i to ratou ra itoitohi e te mana no te Autahua-raa o te vai i nia iho ia ratou ra, faatupu ihora te reira i to ratou itoitohi roa. Na ratou i paihere maite te feia mo'a i taua fenua ra i Tubuai o tei mau te antahu'araa. Manuia roa a'e ra ratou e ta ratou atoa ra ohipa, te maitai ra ia. Ua noaa mai ia ratou te man haamaitia-raa e rave rahi no ô mai i te Atua ra.

I te matahiti 1892, tae faahou maira i Tahiti nei te mau orometua no te Ekalesia nei, rave-faahou-hia ihora te ohipa a te Atua i teie nei mau fenua Oteania, aita râ te mau orometua i tae pinepine i taua fenua ra i Tubuai e tae roa mai i te matahiti 1913. I reira te tonaraahia atu te hoê mau orometua ei tauturu ia ratou, e te hoe orometua Maohi hoi o Rua a Teraupua to'na i'oa. Rave itoitohi atura oia i te ohipa i reira mai te au i to ratou ihora hinaaro e tupu pinepine atura te mau tairururaa rarahi roa i na amaa e piti i Mahu e Taahuaia. Tupu atu ra to ratou mauruuru rahi, e i na matahiti i muri mai, i te matahiti 1918, tae faahou atura te mau Mitinare faaue i taua fenua ra i Tubuai e ia tae ratou i reira, haamata atura ratou i te tuu atu i te

afaroraa no te mau ture a te Ekalesia a Iesu Mesia i te Feia mo'a i te mau mahana hopea nei e mai taua matahiti iho ra i te 1 no Tenuare i te matahiti 1918, tae atura na Mitinare orometua itoitoe e te faaoromai rahi i taua amaa ra i Tubuai. A rave itoitoe ai ratou i taua ohipa evanelia ra, ua tuu ratou i te faito tia no te mau ture a te Ekalesia ma te afaro. Teie to ratou mau i'oa o Tihoti Poropiti, e Iese Hesalopa, e Ioane Monika, e Taranata Benesona, e Terota Roberatona, e na orometua maohi tei tae atoa i taua amaa ra o Raka Toriki a Mariteragi, e Vaio a Makitua, Tepoheiva a Fareata, e to ratou atoa ra mau hoa, oia hoi Katupu a Turoa, e Tuhiatā a Moo e Hamani. A rave itoitoe ai ratou i te ohipa i taua amaa ra, tupu faahou ihora te maitai o te ohipa e ua opere maite hia te mau orometua maohi na te mau oire. Faatupu pinepinehia ihora te mau haapiiraa i te mau taime i faataahia, e ua haapii-pinepine-hia te Evanelia no te Buka a Moromona, e te Buka Fafau, i te mau amaa i faaeahia e ratou, e ua tae hoi taua mau orometua ra, i te 1 no Mati e te avae Me i te matahiti 1919, na rave itoitoe ratou i te ohipa e tae noa atu te avae Atopa i taua matahiti iho ra e ua feruri ratou i te hoe ohipa no te mahana rahi a te Ekalesia i taua amaa ra i Tubuai, e ua faataa te Misionere faatere o Serota Roberatona, i te hoe ohipa na na amaa e toru, oia hoi te amaa i Mahu e Taahuaia e Huahine e ua tuu atura i te amaa i mahu i roto i te rima o te Misionare maohi ra Vaio a Makitua e ua tuu atoa atura i te amaa i Taahuaia i te rima o Raka Toriki a Mariteragi na'na e faatere e ua tun i te amaa i Huahine ia Tepoheiva a Fareata. Area na misionare popaa e tia ia rana i roto i na amaa e toru atoa i te faaitoitorea e te mau ohipa tei faataahia na te mau orometua maohi e faatere, e tae a'e ra i te mahana i haapaohia, oia te ono no Atopa, i teie nei matahiti, haamatahia ihora te ohipa no te amuiraa i te 4 no Atopa, e ua haamatahia te mau pureraa no taua mahana ra i te pô. Haamatahia ihora te haapiiraa a to Huahine, o Tepoheiva a Fareata te Orometua i taua pupu ra, e ia poipoi a'e i

te 5, haamata faahouhia ihora te ohipa no te Amuiraa e ua faatere hia te mau Pureraa e tae atoa mai ra te taata e rave rahi e ua faaotihia te mau ohipa na taua mahana ra i te hora maha i te ahiahi, e ia pô iho tairuru faahou mai ra to te Ekalesia e te feia api i te hora hitu, e faaterehia ihora te haapiiraa a te amaa Taahuaia.

Na Raka Torki a Mariteragi i faatere taua haapiiraa ra e tae noa atura i te hora iva i faaotihia'i. Haere ana'e atura te taata i to ratou iho mau utuafare ma te oaoa. E poipoi a'era, i te 6, rave-faahou-hia ihora te mau ohipa no te amuiraa e ua faaterehia te mau pureraa i taua mahana ra e tae noa'ura i te hora ono i te ahiahi i faaotihia'i haere ana'e atura te taata i to ratou iho fare ma te oaoa, e i taua pô ihora, haaputuputu faahou mai ra te taata no te Ekalesia i te fare pureraa no te haapiiraa tei faataahia na te amaa Mahu. Na Vaio a Makitua i faatere taua haapiiraa ra e tae noa atura i te hora iva i faaoti hia'i te putuputuraa. Reva ana'e atura to te amuiraa i to ratou mau utua fare mai te maitai e te oaoa no te mau ohipa i ravehia i taua na mahana e maha ra. E i taua mahana ono no Atopa ra, putuputu atura te antahua'araa taatoa e i te ahiahi i taua mahana ra, putuputu atoa mai ra te mau tuahine e ua rave-atoa-hia te ohipa bapetizoraa i taua na mahana ra e te haamaitairaa aiû. O te mata-mehai hoi teie no te hoe mahana rahi na te Ekalesia a Iesu Mesia i te Feia Mo'a i te mau mahana hopea nei o tei faatia hia i taua fenua ra i Tubuai. Tupu ihora te hoe mana'o i to tatou mau hoa i rapae i te Etaletia mai te au i te mau mana'o taa ê tei tupu i roto i to ratou aau, ua mana'o ratou e e haere ratou e rave i te mau ohipa mai te au i to ratou ihora mau mana'o e ua opua te tahi pae e haere ratou e ravaai ma te faatura ore i taua na mahana ra. Ia tae râ i te 4 no Atopa tupu maira te hoe matai rahi roa, e ere râ i te mea puai roa, ia tae râ i te 5, haere ihora i te rahi e ia tae i te 6 rahi roa atu ra taua matai ra, e ia poipoi a'e i te hitu, o te mahana

hopea ia no te mau ohipa a te Etalesia, e o te mahana ia i hoi atu ai te mau taeae i to ratou iho mau utuafare, ma te oaoa rahi, tei noaa mai ia ratou no te ohipa i ravehia i taua nau mahana ra. E to te mau amaa e, tera mai te huru mau o taua fenua ra o Tubuai e te mau ohipa i ravehia e ratou, Iaorana outou Amene, Vaio a Makitua.

TE HAAMO'ARAAHIA TE HIERO API I HAVAIL.

I te 27, 28 e te 29 no Novema ua tomohia e haamo'ahia te hoê hiero api no te Etaretia a Iesu Mesia i te Feia Mo'a i i te Mau Mahana hopea Nei, i Laie' i te fenua ra, o Havaii. No te rahiraa o te feia mo'a o te tairuru i reira, aita taua ohipa ra i faaotihia i te mahana hoê. Tei ore i tae atu i te mau pureraa i te mahana matamua, ua putuputu ia ratou i te piti e te toru o te mahana. Na te peropheta Hebera Garana-ta i faatere i te mau pureraa e te mau ohipa hoi no na maha-na e toru ra. O reira hoi Anatonu Luna (te tauturt hoê no te peresideni no te Etaretia) Rudera Talatona e Tetephano Ritade, (no te tino ahuru ma piti raua), Tihare Nibele, (te epitiopo faatere no te Etaretia), e Araturu Vinitera (te hoê o te mau faatere no te ohipa haapiiraa o te Etaretia).

E i te matahiti 1850 te haamataraa o te ohipa misinare i te fenua Havaii, O Tihoti Canona te peresideni matamua i taua paeau ra. E mai reira mai e tae noa' tu i teie nei maha-na, ua manuia roa te ohipa a te Fatu i Havaii. Te faaotiraa e te tomoraa o taua hiero api nahenehe ra, o te haamataraa ia no te hoê tau api, e e tapao-faaite-raa hoi ia i to te Atua aroha e to'na ra haamaitai-rahi-roa-raa i te mau taata tei no-ho i taua fenua ra.

Teie hiero api i tomohia a'enei i Havaii, o te hitu ia o te mau Fare O te Fatu a te Feia Mo'a i te mau mahana hopea nei i patu i to ratou ra Atua. Te hiera matamua i faatia-hia i te tau hopea nei, ei te oire Kiritilano ia, i te tufaa fenua i Ohio. E i Nauvu te piti o te hiero i faatiahia'i. Hoê milioni dala te moni i pau no te faatiaraa i taua hiero ra. Ua haamo-

'ahia ia hiero i te matahiti 1846, hoē matahiti e te afa i muri mai i te taparahiraahia te Peropheta Iosepha Semita (metua). Teie hoi te tahi mau hiero i faatiahia e te mau tavini o te Fatu i te anotau hopea nei:—

1. Te hiero i Saneta Tihoti i Utaha. (I tomohia i te 6 no Eperela, 1877).

2. Te hiero i Logana i Utaha. (I tomohia i te 17 no Me, 1884).

3. Te hiero i Manati i Utaha. (I tomohia i te 6 no Eperela, 1893).

4. Te hiero i Roto Miti i Utaha. (I tomohia i te 6 no Eperela, 1893).

2. Te hiero i Caratona i Canada. (Ua haamaitahia to'na ra tiaraa i te 19 no Setepa i te matahiti 1915).

Na teie nei parau i nia nei e haapii i te ta ta atoa e, te haapao nei te Etaretia a Iesu Mesia i te Feia Mo'a i te mau mahana hopea nei, i te parau a te Fatu te na ô mai e, "To'u fare mo'a, o te faauehia to'u ra mau taata i te mau tau atoa ia patuhia i to'u ra i'oa mo'a." B. F. S. 107:12.

E IRITI TATOU I TE UPUTA O TO TATOU MAU AAU.

E peu ino no te taata nei te faatautauraa i te mau paruru ereere e te haapoiri i nia iho i te mau hio haamaramarama? E ere anei ia ratou no te faataeraa i te mau hihi o te mahana i roto i te mau piha ia ore taua mau piha ra ia pouri e ia rumaruma? E ua roto hoi i taua mau hio haamaramarama ra e hio atu tatou i te mau tiare e te mau raau e te mau mea araa atoa tei rapae mai i te fare. Mai te mea ra e, e tapoi tatou i te mau hio haamaramarama i te mau paruru, eita te maramarama e tae mai i roto i te piha ra.

Ua ite tatou e, te vai nei te mau manumanu ma'i o te ore roa e hope ia taio. Te rahiraa ra o taua mau ma'i ra, e e pohe ia ratou i te mau hihi o te mahana. No reira e imi

ratou i hoê vahi pouri o te ore e taeahia e te mau hihi o te mahana ra. E mai te mea ra e, e huru pouri e te rumaruma te mau piha o to tatou mau fare, e riro taua mau manumanu ma'i e rave rahi ra i te vai ora noa i reira.

E hio na tatou i te huru o te mau manumanu rii. E ere anei ia i te parau mau e, e mea au ore i te naonao, te mau hihi o te mahana? Oia mau ia E imi te ro i te vahi mahana ore. E mai te mea ra e, e hiopoa tatou i to tatou ra mau piha, e ite tatou e, ei te piha o te hau i te pouri e te rumaruma e vai rahi noa ai te mau manu, te mau tu'u e to ratou ra mau puaveravera e te mau manumanu e rave rau. E te hopea o te taata o te parahi i ô a'e i taua mau manumanu ra, o te ma'i ia e te pohe.

Hoê ana'e huru te piha o te fare, e te aau o te taata. Ia haamaramaramahia te aau, aore râ, te piha varua o te taata e tia'i. Ua au hoi te varua a te Fatu i te mau hihi o te mahana. Tirara ana'e iho ta tatou ohipa e rave, e ô ai taua varua i roto i to tatou mau aau ra, oia hoi, te iritiraa ia i te mau uputa hoi haamaramarama.

Ua ite te hoê mau taata paari i te anotau tahito, i teie mau mea. O Marecu Aureliu (Marcus Aurelius) te hoê, te na ô maira oia, "Tei te mau vahi atoa te mana varua, e te ineine noa nei ia varua, mai te mata'i hoi i ineine, ia faa'i i te taata'toa o te farii i te reira."

Aita râ te rahiraa o tatou e ineine nei e farii mai i taua varua ra. Te faatautauhia nei te mau paruru ereere e te haapouri i te mau uputa o to tatou mau aau. E taua mau paruru ra, o to tatou mau hara ia.

Te riro nei te feii, te nounou i te mea tia ore, e te mârô ei paruru o te nenahia i ropu i to tatou mau aau e te varua a te Fatu.

Ia faarue râ tatou i taua mau paruru ra, e putapû to tatou mau aau pouri i te maramarama e te parau mau.

Te na ô maira te Fatu e, "Inaha, te tia noa nei au i te uputa, te patoto atu nei ia faaroo mai te hoê taata i tau reo,

e ua iriti i te opani ra, e haere atu vau i roto ia'na ra." Apokalupo 3:20.

Te ineine noa nei te Atua i te haaparahi i to'na varua i roto i te taata'toa. No tatou nei te maoro e te taupupuraa e ere râ no'na. Te vai nei te hoê huero Atua i roto ia tatou atoa, no te mea, e huaai mau to tatou mau tino varua no'na ra. A hio i te Ohipa 17:28,29.

Ia ore te pape, te mata'i e te mau hihi o te mahana ia tae atu i te mau huero e te mau raau rii, e ore roa ia ratou e tupu maitai e faahotu mai i te maa maitai. Mai te reira hoi te huru o teie mau huero Atua o roto i te aau o te taata nei. Ia iritihia te uputa o te aau e tia'i, ei reira e tae mai ai te varua a te Atua i roto ra. Ia faaapu-maitai-hia hoi taua mau huero ra e tia'i. E mai te mata'i, te pape e te mau hihi o te mahana e riro ei ora i te huero raau ra, e na reira hoi te hau, te arofa, te mārû e te faaoromai i te riro ei ora i to tatou mau varua.

E no reira, e hoa ino ma e, e matana tatou i te hiopoa ia tatou iho penea'e o te vai nei te hoê paruru i ropu ia tatou e te varua a te Fatu. E purumu ê atu i te mau puaveravera e te repo mai nia'tu i te mau hio haamaramara o to tatou mau aau, a iriti atu ai hoi i te mau paruru haapoiri o te nenahia e te hara, e o te faataa nei ia tatou i te arofa a te Fatu; ei reira te varua a te Fatu, e ô ai i roto, mai te faa'i ia taton i te umere, te popou e te oaoa mure ore.

Papaihia e,

Aneterea Sedamana.

TE MELAHI O TE AMU I TE AVAAVA.

E taata maitai te hoê orometua no te hoê haapaoraa i Ilinoi, i Marite, area râ e peu no'na, te amu-noa-raa i te avaava.

I te hoê mahana te haere ra oia na te hoê vahi e huru atea i te oire, roohia ihora oia i te ua rahi roa. Horo oioi atura oia na te purumu, tae atura oia i te hoê fare nainai.

Ua patoto ihora oia i te uputa o taua fare ra; e ua iritihia ihora te opani o te fare ra, e te hoê vahine huru paari. Ua ani atura te orometua i taua vahine paari ra ia farii ia'na e ia faatia ia'na ia haere i roto i te fare ia ore oia ia rari i te ua.

Ua pahono mai taua ruau ra ia'na, na ô maira, "Aita roa vau i ite ia oe." E huru tapitapi oia i te farii i te taata ê.


Ua na ô atura te orometua ia'na ra e, "E haamana'o na oe i tei papaihia i roto i te Hebera, i te pene 13 e te irava 2, oia hoi, Eiaha e faaore i te ite atu i te taata êê ra, e melahi hoi tei itehia'tu e vetahi, aore hoi i ite e melahi."

Ta na ô maira taua ruau i te pahonora'a'tu ia'na ra e, "Aita te melahi e haere mai i ô nei, mai te î to'na vaha i te avaava faufau ra." E ua opani oioi oia i te uputa, mai te vaiiho i taua orometua i rapae i te ua.

TEMPLE.



SALT LAKE CITY, UTAH.



Te hoho'a teie no te Peropheta Birigamu Youne. Na'na
i faataa i te mau orometua matamua o tei tae atu i teie mau
fenua nei i te matahiti 1844.

Mau Parau Apî

Ua hamani te hoê taata no te oire Worcester, Massachu-
sets, i te hoê pupuhi apî. Teie te toroa no taua pupuhi ra,
oia hoi, te pupuhiraa'tu i te mau ofai i roto i te reva, ia taa
maitai ia tatou te huru no te mata'i i te vahi teitei, to'na toe-
toeraa, to'na mahanahanaraa, e tona faito mau. Ia pupuhi-
hia te hoê ofai, e taua pupuhi ra, e tere atu te reira ofai i te
vahi teitei roa. e ia paruparu to'na tereraa e anapa faahou
te tahi vahi paura tei roto ia'na, e e tere faahou atu â taua
ofai ra i nia roa'tu â. E e na reira noa e ia taeahia noa'tu te
vahi i haapaohia no'na ra. Ia pau roa te paura i roto i te ofai
i te anapahia, e topa mai taua ofai ra i te fenua nei. Ei rei-
ra te ofai e hiopo'ahia'i. Na te mau matini rii, mai te baro-
meta te huru, tei roto i taua ofai pupuhi, e haapii mai i te
mau taata paari i te huru no te mata'i i te vahi teitei i nia.

Te mana'ohia nei e, mai te mea e, e navai te paura te
tuuhia i roto i taua ofai pupuhi ra, e tae atu oia i te avae.
Tei California te taata, no'na taua pupuhi ra. O Robereta
H. Godada (Robert H. Goddard) to'na i'oa.

Ua imi a'e nei te hoe taote o Allen Rogers to'na i'oa, i
te hoê ravea ia rapaau i te iri no te Mao. Te mana'o nei
oia e, e faufaa rahi roa te iri o te mao no te hamanihira taa
e te mau mea atoa o te hamanihia uei i te iri puua. Te faaite
mai nei oia e, e noaa e hoê tauatini mao i te mahana hoê i
te mau taata ravaai paari. Te mau mao o te ravaahia i teie
nei mau mahana, te haamauahia nei ia. Te taparahi nei te
mau taata ravaai i te mau mao o te itea ia ratou, mai te faa-
rue ia ratou i roto i te miti. Te haapii mai nei taua taote ra
e, e nehenehe noa ia faariro i teie nei mau mao, ei faufaa
rahi i te taata. Te i'o e te toto, e hoohia ia i te mau taata
faaapu no te haamaitairaa i te repo. Te iri, e faarirohia ia e
mono no te iri puua. Te vai nei hoi te hinu i roto i te mao,
e e riro atoa te reira e faufaa i te taata.

ERNEST C. ROSSITER, Imprimeur, Rue brea et de la
Rue Dumont d'Urville, Orovini, Papeete, Tahiti
